


太常因革禮
二



太常因革禮

(二)

歐陽修等奉敕編

太常因革禮卷二十四

總例二十四

輿服四

輿服四

禮閣新編咸平五年大理寺丞李坦奏臣聞禮行于郊而百神受職焉禮行于社而百貨可極焉是故禮者治國之柄服者飾神之儀歷代成規後王不易臣昨蒙差郊壇下助祭竊見助祭之官所服六冕衣裳畫繡之等多不依古制又慮後來增減不同然臣案孝經云非先王法服不敢服今來法服顯有殊異況臣常講禮書聞冕冠本于軒皇玉帛始于虞氏夏商革命損益可知文武重光典章斯備案尙書皋陶云予欲觀古人之象日月星辰山龍華蟲作會宗彝藻火粉米黼黻絺繡此十二章也六章畫于衣象天也六章繡于裳象地也夏商無文至周三辰畫于旌旗惟九章在于衣裳之上周有六冕案司服云王祭昊天上帝則大裘而冕祭五帝亦如之享先王則衮冕享先公則鷩冕祀四望山川則毳冕祭社稷五祀則絺冕祭羣小祀則玄冕鄭司農云大裘羔裘也所以知爲羔裘祭天尙質故用之象天色也裘冕之旒天子十二旒升龍于山升火于宗彝若上公則九旒自山龍而下九章侯伯鷩冕七旒自華蟲而下七章子男卽毳冕五旒自宗彝而下五章孤卿卽絺冕三旒三章無畫皆繡凡奇數在衣偶數在裳今具六冕祭

服異同事件。乞行改正。詔太常禮院詳定。聞奏。禮院具檢討如後。伏緣冕旒之制度。繡畫之等差。歷代以來。屢有沿革。若循古制。須議酌中。改作之閒。安敢輕議。一周六冕。若玄上纁下。玄上法天。纁下法地。兼前後遂延。今觀冕版上下之色。皆用玄青。亦遂延一失也。今檢詳郊祀錄。皇帝祀天地神祇。則服大裘冕。案三禮義宗云。祭天所以用大裘者。是羊羔裘也。黑者。象天色。玄大者。擬覆幬垂蓋之。故服大裘以祀天也。冕者。勉也。所以勉人爲高行。凡六冕之服。皆玄上纁下。冕旒大同。無以爲別。故不謂冕爲服。但取畫章之異。以爲立名。故用服名冕。一六冕之旒數。若大裘冕。卽無冕旒。若袞冕。天子十有二旒。前後遂延。上公卽九旒。每旒五采。就爲之。每一寸安一玉。玉皆五色。朱、白、蒼、黃、玄。諸侯卽三采。夏商朱、綠。皆周而復始。十二旒。旒各一尺二寸。用玉一百八十八。若上公九旒。用玉百六十二。今觀旒玉純用一色。其數不與昔同。是二失也。今檢詳凡享廟謁廟。及遣上將。征還飲至。則服袞冕。案自袞冕而下。服名冕者。皆是畫衣章之首。袞冕所以祭先王者。爲服以龍爲首。龍德神異。應時潛見。象王者有神異之德也。其冕垂白珠十有二旒。以組爲色。如其纓。玉藻云。天子玉藻。十有二旒。前後遂延。龍袞以祭。鄭玄云。冕之旒。以藻紉貫玉爲飾。因以名也。十有二就。每一就貫一玉。就閒相去一寸。則旒長尺二寸。垂而齊肩也。五采者。依射侯之次。從上而下。初以朱。次以白。次以蒼。次以黃。次以玄。以五采玉旒貫徧。周而復始。此並周制也。至漢明帝用曹褒之說。皆白璇珠。與古異也。魏文帝好婦人飾。改珊瑚珠。至晉江左。又改漢制。今用白珠之制。自漢始焉。大

下四章繡于裳上。六曰藻。七曰粉米。八曰黼。九曰黻。今又無藻文。餘三章亦不絺繡。是三失也。今檢詳義纂云。周禮袞冕九章。尙就置于山。謂之龍袞。鄭玄謂袞者。卷也。龍能變化舒卷。因以名焉。以五采繡紃貫玉。前後各十二旒。用玉二百八十八也。秦除古制。皆服衿玄。漢明帝始采舊法。繫白玉珠爲旒。以組爲纓。黻纁充耳。玄衣纁裳。十二章。自日月星辰山龍華蟲藻火宗彝八章。畫之于衣。粉米黼黻四章。繡之于裳。織成爲之。標領皆升龍焉。唐制。白紗爲中衣。以黻爲領。烏加金飾。入廟踐阼。加元服。納后元日受朝。及臨軒册拜王公。則服之。是承漢禮也。又周禮。天子袞冕十有二旒。十有二就。就貫一玉。就閒相去一寸。則旒長尺二寸。各用十二玉也。又案郊祀錄云。其服玄衣纁裳。十二章。案易云。黃帝堯舜垂衣裳而天下治。蓋取諸乾坤。韓康伯注云。上衣下裳。取乾坤之象有上下也。釋名。上衣曰衣。衣者依也。下服曰裳。裳者障也。所以障蔽也。夫衣玄者。象天色也。裳用纁者。法地色也。不法蒼黃之色者。凡衣裳悉明其身。有章彩文物。以蒼黃太質。故用玄。纁者是朱之小別。故周禮鍾氏云。三入爲纁。鄭注士冠禮云。朱則四入。是與纁同類也。十二章者。法天之大數。虞帝之服也。聖朝之制。舜服也。日月星辰山龍華蟲火宗彝。此八章在衣。藻粉米黼黻。此四章在裳。衣標領爲升龍。皆織成爲之。案三禮義宗。日月星辰三章。直畫作其形。欲明王者有光照之功。垂于下土。山亦畫山形。取其能興雲雨。膏潤萬物。象王者之澤沾于下也。龍亦直畫龍形。取其變化無方。或潛或見。適顯王者之德。卷舒有時。應機布道。華蟲者。畫作鸞雉之體。有文飾。故謂之華。象其

雉身被玉色。有炳蔚之姿。似王者體合五常。兼文明之性。宗彝者。畫虎。雌于宗廟之器爲飾。因而明之。虎象雖以剛猛制物。王者亦以威武定亂也。藻。畫其形。藻能逐水上下。似王者之德日新也。火。粉米。直畫其形。粉潔白。故以名之。米者。人恃之以生。王者亦物之所賴以理也。黼。畫斧形。象王者能斷割。臨事能決之也。黻者。兩已相背。明民見善改惡也。此皆聖人法象之意。周則畫九章。又登龍于山。登火于宗彝。尊其神明故也。案古禮皆衣畫裳。繡法陰陽之義。衣數則奇。裳數則偶。今聖朝制令上八下四。皆以偶而言。又王服自袞冕已下。皆織成爲之。是王者相變也。山龍以下。每一行以爲等。每行十二。案禮圖。凡章文參錯。滿衣裳而已。不拘其數。崔靈恩云。各畫十二焉。亦取則天之大數。一。鷩冕七章。畫三章于衣。繡四章于裳。鷩旒五章。畫三章于衣。繡二章于裳。絺冕。上下皆繡黼黻而已。今等級不同。是四失也。檢詳郊祀錄。鷩冕八旒。其服七章。華蟲。火。宗彝。此三章在衣。藻。粉米。黼。黻。此四章在裳。案三禮義宗云。雉言鷩者。以爲獸鳥體卑。義不足取。故文采章著者。以爲稱也。祭先公者鷩冕。以雉爲首。雉有專介之志。象先公有賢才。能守節度也。故左傳云。聖達節。次守節。餘同裘冕。毳冕七旒。其服五章。宗彝。火。粉米。三章在衣。黼。黻。二章在裳。案三禮義宗云。凡章服之中。唯有龍。雉。虎。雌。並是禽獸。龍能變化。其體可尊。故不隱其名。鷩及虎。雌。兼其體卑。故沒其正體。所以龍。雉。各自爲章。虎。雌。合爲一章者。龍爲神化。雉爲文明。神化文明。理皆陽。虎。雌。山林之獸。義皆是陰。故龍。雉。各一而成章。虎。雌。合兩而爲體。于陰陽之義也。以毳冕祭四望者。四望是五嶽四

黼黻二章在裳。案三禮義宗云：粉米一章刺于衣，黼黻二章繡于裳也。祭社稷五祀者，緇冕以粉米爲首。社稷者，土穀之神，此米由之而成，故服之以象其功也。五祀者，五官之神，能平五官之政，皆有水土之功，故亦同服也。所以獨米刺者，凡畫績之法，以衆色而成一色，則不足以成畫，故宜直刺而已。又此服是臣服之首，不畫衣，以下于君，示無陽之義也。今皆織成焉，是名存而制異也。餘同緇冕，玄冕五旒，其衣無章，唯裳刺黻一章。案三禮義宗云：祭羣小祀，本百物之神，其形難可徧擬，故但取兩已相背以名其異。餘同緇冕，一鞞未依制度。案玉藻云：下廣二尺，上廣一尺，又明堂位云：有虞氏以鞞，夏后氏以山，商人以火，周人以龍章。注云：天子備焉，諸侯火而下，卿大夫以山，士韎韐而已。今別畫粉米黼黻，是五失也。今檢詳義纂，鞞何殊禮云：鞞，君朱，大夫素，士爵韐，上廣一尺，下廣二尺，其頸五寸，肩革帶博二寸，頸中央，肩兩角皆上接革帶以繫之，肩與革帶其廣同矣。皆黻其裳前，示恭謹也。于朝服謂之鞞，于冕服謂之蔽膝。朝祭異名，其實一也。又案五禮精義問蔽膝對曰：皆從裳色。三品已上山火二章，四品一章，五品無章。玉藻云：鞞，君朱，大夫素，士爵韐。鄭玄云：此玄端服之鞞，象裳色。則天子諸侯玄端朱裳，大夫素裳，唯士玄裳黃裳，雜裳也。若祭服皆玄，上纁下，故云一命纁黻，再命已上赤黻也。又臣覲大帶制度，玉藻云：天子素帶，朱裏終辟，諸侯素帶，終辟，大夫素帶，辟垂，士練帶，率下辟。今覲等級不當，是六失也。今檢詳義纂云：大帶何施禮云：天子素帶，朱裏終裊，紐約用組。鄭玄云：裊，緣飾也，以素爲帶，以朱爲裏，紕其外者，上以朱，下以綠。

則帶身在腰及垂皆飾之。是以謂之終裨。其制博四寸。紐帶之交結處也。約結其帶也。執事者以黼黻裳前視恭敬之道也。天子之黻以朱。直方四角。無圓殺。上闊一尺。象天數一也。下闊二尺。象地數二也。長三尺。象三才也。唐禮以緡爲之。朱質。畫龍山火三章爲飾。以備三代之法也。臣今檢案古今沿革在前。伏乞特行改正。詔付有司。依李坦並禮院檢討名件制度改正。務合先王禮意。封禪記。大中祥符元年。詳定所言。案六典。天子之服冕。一曰大裘冕。無旒。冕以黑羊皮爲之。祀天地神祇則服。二曰衮冕。垂白珠十有二旒。玄衣纁裳。十二章。享廟謁廟及告廟則服。今參詳。封禪祭天地。準典禮。皇帝服大裘。又緣南郊合祭天地。只服衮冕。欲望封禪日。依南郊例。服衮冕行禮。上曰。前王服羔裘鹿裘。以尙質也。今有衮冕之制。可從之。眞宗實錄。大中祥符六年。詳定所言。將來朝拜聖像于行殿。皇帝服衮冕。準月令。孟夏初衣暑服。孟冬始衰。今尙衣庫衮冕。蓋每歲仲冬親郊祀圓丘所服。皆是夾衣。今盛暑之際。望依冕服制度。改用單衣。詔可。禮院例冊。景祐二年八月二十七日敕令。入內內侍省。御藥院。與禮院同。其衣詳典故製造。冠冕令稍減珍華。務從簡約。仍先具圖進呈。續奉敕。通天冠絳紗袍。更不修製外。平天冠。天版。元闊一尺二寸。長二尺四寸。今制造廣八寸。長一尺六寸。減翠旒並鳳子。前後使二十四旒。並合典制。天版頂上。元是織成龍鱗錦爲表。紫雲白鶴錦爲裏。今製進使青羅爲表。彩畫爲龍鱗。紅羅爲裏。彩畫出紫雲白鶴。所有上面犀瓶子。琥珀瓶子。各二十四箇。今減不用。金絲結網子上。舊別有金絲結龍八條。今減四條。亦減金

等七寶元造眞玉碾成今更不用如補空卻以雲龍細窠分旒玉鈎二枚今減不用天河組帶款慢帶依舊只減輕織造納言元使玉製造今來使青羅彩畫出龍鱗錦依舊金稜上面稜道依舊使金卽舊減輕製造黠纈玉簪袞服八章日月星辰山龍華蟲火宗彝青羅身紅羅襖繡造所有雲子相度稀稠補空製造更不用細窠亦不使眞珠裝綴中單依舊皁白製造裙用紅羅繡出藻粉米黼黻周回花樣仍舊繡出減稀製造蔽膝用紅羅繡升龍二條雲子補空減稀繡造周回依舊細窠不用六采綬依舊減絲織造所有玉環亦減輕造帶頭金葉減去卻用銷金製造四神帶更不用劍佩梁帶襪舄並依舊禮院儀注至和三年九月一日翰林侍讀學士王洙奏皇帝法服冕旒形度重大華飾稍繁伏緣將來恭謝大禮在近欲望特命儒臣參稽典禮別加詳定令合古制詔送禮院檢詳古今典禮制度關送御藥院取旨製造禮院奏今將古今制度參詳到冠冕並圖畫在前如允所奏乞降製造

禮院參詳文字今亡

太常因革禮卷二十五

總例二十五

輿服五 后妃之制 皇太子之制

羣臣之制上

后妃之制

通禮不著后妃車輅之制。國朝會要。皇太后皇后車輦。唐制六等。一曰重翟。二曰厭翟。三曰翟車。四曰安車。五曰四望車。六曰金根車。皇朝鹵簿。唯用厭翟車。其制箱上有平盤。四角曲欄盤。兩壁紗牕。龜文金鳳翅。前有虛匱。香爐。香寶。緋繡幟衣。絡帶。門簾。三轅。鳳首。畫梯。推竿。行馬。緋繒裏索。駕六馬。金銅面。纓轡鈴。轡。緋履。駕士三十人。武弁。緋繡衫。常出止用正副。金塗銀裝。白藤輿各一。上覆樓欄屋。飾以鳳。輦官服同乘輿平頭輦之制。咸平中。萬安太后輿上設行龍六。制飾率有加焉。禮院例冊。乾興元年九月。禮儀院奏。準詔製造皇太后御座檐子。令詳定制度。所稱名目。今乞以大安車爲名。詔可。通禮。褱衣。素紗中單。蔽膝。大帶。以青衣革帶。青褱。白玉雙珮。玄組。雙大綬。受冊。親蠶。朝會。諸大事。則服之。鞠衣。黃羅爲衣。其蔽膝。大帶。及衣革帶。烏。並隨衣色。飾與褱衣同。惟無翟。親桑。則服之。釵鈿裏衣。十二鈿服。通用雜色。制與上同。加雙珮。小綬。加履。宴見賓客。則服之。國朝會要。皇后之服。唐制有三等。一曰褱衣。朝會服之。二曰

鞠衣親蠶服之。三曰襴衣。宴見服之。皇朝存其名。常服龍鳳珠翠冠。霞帔。禮閣新編。建隆元年八月二十六日。太常禮院狀。準敕製造皇太后冊寶法物等。謹具條例如左。玉冊一副。並匣。帔。鑲沿冊法物等。中書省與內中尙司計會修製。綜寶綬。並盞。帔。鑲鑰沿寶法物等。門下省內中尙司計會修製。緯衣一副。十二株花釵。行障三扇。坐障三扇。團扇二柄。方扇十柄。輦一座。繡六柱二扇。尙宮二人。一人引冊。讀冊。奉令。宣答。一人奉引。皇帝稱。尙儀二人。一人押冊案。一人奉引。皇帝奏再拜。尙服一人。引寶案讀寶。其行事。尙宮已下。並戴髮衣。司言。司贊。司賓。典贊。並戴髮。皆檔衣。司記。司寶。舉案者。並常服。自緯衣已下。並內中尙司修製。詔可。禮院例冊。天聖元年十二月。詔曰。皇太后總理軍國。眞宗皇帝禪除在近。其令禮官檢詳禮衣制度。以聞。禮官言。皇太后服與皇后同禮。首飾花十二株。小花如大花之數。並兩博並。緯衣。素紗中單。蔽膝。大帶。以青衣革帶。青襪。烏白玉雙佩。玄組。雙大綬。受冊親蠶。朝會諸大事。則服之。又案。隋朝后服四等。其四曰朱衣。以緋羅爲之。宴見賓客。則服之。今參詳。朝謁聖容及乘輦。則服朱衣。加蔽膝。革帶。大帶。珮。綬。襪。金飾履。並隨衣色。如常視事。則亦服朱衣。用大帶。綬。金飾履。或去綬。只用大帶。去蔽膝。革帶。佩。襪。或服鞠衣。用黃羅爲之。大帶。綬。金飾履。其首飾。則依花十二株制度。詔可。國朝會要。明道二年。皇太后恭謝宗廟。禮官議禮衣。請準皇帝袞服減二章。衣去宗彝。裳去藻。不珮劍。九龍十二株花釵冠。前後垂珠翠各十二旒。以袞衣爲名。曰儀天冠。又言。皇太后赴太廟。乘玉輅。服緯衣。九龍花釵冠。行禮。服袞衣。儀天冠。皇太妃。皇后。乘重翟車。服鈿釵襴衣。以緋羅爲之。蔽膝。革帶。佩。綬。履。其冠用十二株花釵。太廟行禮。並服緯衣。詔可。

皇太子之制

通禮不著皇太子車輅之制。國朝會要。皇太子車輅。唐制三等。一曰金輅。二曰輅車。三曰四望車。至道初。眞宗爲皇太子。謁太廟。乘金輅。常朝則乘馬。天禧中。仁宗爲皇太子。亦同此制。通禮不著皇太子之服。國朝會要。皇太子之服。袞冕。青羅表。緋羅紅綾裏。塗金銀鈹花飾。犀簪導。紅絲組。前後九旒。二纁。貫水晶珠。青羅衣。繡山龍雉火虎。雖五章。紅羅裳。繡藻粉米黼黻四章。紅羅蔽膝。繡山火二章。白紗中單。青標。襪裾。革帶。塗金銀鈹。瑜玉雙佩。四彩織成大綬。結二玉環。金塗銀鈹花飾。青羅抹帶。紅羅勒帛。玉具劍。金塗銀鈹花玉標首。白羅襪。朱紅履。金塗銀鈹。從祀則服之。遠遊冠。十八梁。青羅表。金塗銀鈹花飾。犀簪導。紅絲組。博山。朱明服。紅花金條紗衣。紅紗裏。皐標襪。紅紗裳。紅紗蔽膝。並紅紗裏。白花羅中單。皐標襪。白羅方心。曲領。白羅襪。黑烏革帶。佩綬劍。餘同襪帶勒帛。受冊謁廟。朝會則服之。禮閣新編。至道元年十月二十五日。太常禮院狀。來年二月南郊。準禮例。皇太子侍從皇帝。充亞獻行禮。所有合著祭祀服色。伏乞下少府監修製。仍開陳古今制度者。袞冕垂白珠九旒。以組爲纓。色如其綬。青纁充耳。犀簪導。玄衣纁裳。服九章。每章一行。重以爲等。每行九五章。在衣。山。龍。華蟲。火。宗彝。四章。在裳。藻。粉米。黼黻。皆織爲之。白紗中單。黼領。青標。襪。裾。革帶。金鈹。大帶。素帶不朱裏。亦紕以朱綠鈹。紐約用組。鞞隨裳色。火山二章。玉具劍。金寶爲飾。玉鏤首。瑜玉雙佩。朱組。雙大綬。四采。赤。白。纁。紺。純朱質。長一丈八尺。三百二十首。廣九寸。小雙綬。長二尺六寸。色同大綬。而首半之。閒施二玉環。朱襪。赤烏。烏加金飾。侍從皇帝祭祀。及謁廟。加元

服納妃則服之詔令文思院依禮院所申製造禮閣新編至道二年冊命皇太子禮官上言周禮天子執鎮圭公執桓圭無太子執圭之文所謂公者三恪及上公也晉書太子出位在三恪之下三公之上請定制皇太子服遠遊冠朱明衣執桓圭以受冊朝會謁廟亦如之宴坐在王公上詔可

羣臣之制上

通禮無羣臣車輅之制國朝會要羣臣車輅唐制有四一曰象輅親王及一品乘之二曰革輅二品三品乘之三曰木輅四品乘之四曰輅車五品乘之皇朝親王一品二品奉使及葬並給革輅制同乘輿之副惟改龍飾爲螭六引內三品以下乘革車赤質制如進賢車無案駕四赤馬駕士二十五人其緋幘衣給帶旗戟綢杠繡文司徒以瑞馬京牧以隼御史大夫以獬豸兵部尙書以虎太常卿以鳳駕士衣亦同縣令乘輅車黑質兩壁紗牕一轅金銅飾紫幘衣絡帶並繡雉銜瑞草駕二馬駕士十八人百官常朝皆乘馬禮閣新編大中祥符四年七月知樞密院王欽若奏王公車輅不得與南郊車輅一庫收附竊緣王公車輅上並用龍飾臣欲乞下有司檢定制度將見管車輅更改修製庶尊賤有差永爲定式尋詔禮院詳定聞奏者禮官奏檢詳禮例鹵簿令王公已下輅象輅以象飾諸末朱班輪八鸞在衡左建旗旗畫龍一升一降右載闔戟革輅以革飾諸末左建旗通帛餘同象輅木輅以漆飾之餘同革輅輅車曲壁青通幘碧裏諸輅皆朱質朱蓋朱旗旗一品九旒二品八旒三品七旒四品六旒其輦纓就數皆準此院司檢詳王公車輅制度如前欲乞下太僕寺依此修製詔可通禮衰冕青珠九旒以組爲纓青纁充耳角簪導青衣纁裳

服九章。白紗中單。革帶。鈎鑣大帶。金玉飾劍。山玄玉佩。綠綬。朱襪。赤舄。一品服之。鷩冕。八旒。服七章。水蒼玉佩。紫綬。金飾劍。餘同衮冕。二品服之。鷩冕。七旒。服五章。水蒼玉佩。紫綬。金飾劍。餘同衮冕。三品服之。絺冕。六旒。服三章。水蒼玉佩。青綬。金飾劍。餘同衮冕。四品服之。玄冕。五旒。無章。裳刺蔽膝一章。水蒼玉佩。黑金飾劍。餘同衮冕。五品服之。爵弁。色同爵。無旒。玄纓。簪導。青衣。纁裳。白紗中單。革帶。鈎鑣大帶。爵鞞。白襪。赤履。九品已上服之。凡冕服及爵弁。助祭及親迎。則服之。國朝會要載下所王公已下冠服。唐制有衮冕。九旒。鷩冕。八旒。鷩冕。七旒。絺冕。六旒。玄冕。五旒。爵弁。朝服。公服。袴褶。弁服。皇朝省八旒冕。六旒。弁服。九旒冕。有二。其一。塗金銀花額。犀玳瑁簪導。青羅衣。繡山龍雉火虎雌五章。緋羅裳。繡藻粉米黼黻四章。緋蔽膝。繡山火二章。白花羅中單。玉裝劍佩。革帶。暈錦綬。二玉環。緋白羅大帶。緋羅襪履。親王。中書門下。奉祀。則服之。其一。九旒冕。無額花。玄衣纁裳。悉畫。小白綾中單。獅子錦綬。二銀環。餘同上。三公奉祀。則服之。七旒冕。犀角簪導。衣畫虎雌粉米三章。裳畫黼黻二章。銀裝佩劍。革帶。餘同九旒冕。九卿奉祀。則服之。五旒冕。青羅衣裳。無章。銅裝劍佩。革帶。餘同七旒冕。四品五品爲獻官。則服之。六品以下。無劍佩。綬。紫檀衣。朱裳。羅爲之。阜大綾綬。銅裝劍佩。御史博士服之。平冕。無旒。青衣纁裳。無劍佩。綬。餘同五旒冕。太祝奉禮服之。五梁冠。塗金銀花額。犀玳瑁簪導。立筆。緋羅袍。花羅中單。緋羅裙。緋羅蔽膝。並阜襌襖。白羅大帶。白羅方心。曲領。玉劍。佩銀。革帶。暈錦綬。二玉環。白綾襪。阜皮履。一品二品侍祠。朝會。則服之。中書門下。則冠加籠巾。貂蟬。籠巾編藤。漆之。塗金銀飾。玳瑁蟬。一金蟬。六銜玉。三梁冠。犀角簪導。無中單。銀劍佩。獅子錦。

綬銀環。餘同五梁冠。諸司三品、御史臺四品、兩省五品、侍祠朝會則服之。御史大夫中丞則冠有獬豸角。兩梁冠。犀角簪導。銅劍佩。練鵲錦綬。銅環。餘同三梁冠。四品、五品、侍祠朝會服之。六品以下無中單。無劍佩。御史則冠有獬豸角。衣有中單。袴褶。白羅方心曲領。本品官導駕則騎而服之。禮閣新編。建隆四年八月。宰相范質與禮官議。導駕官服袴褶衣。制度所起。先儒並無其說。惟開元禮。五品已上通用細綾及羅。六品以下服小綾。褶衣之色。隨本品綬色。注。褶衣卽複衣也。又案。諸王朱綬。四采。赤、黃、縹、紺。赤卽朱也。以純朱爲地。更次第輕入黃、白、青、汁內染之。共爲四采。亦謂之朱褶。一品綠縹綬。四采。綠、紫、黃、赤。縹卽綠也。是草之綠色。以純綠爲地。亦謂之綠縹綬。二品三品紫綬。三采。紫、黃、赤。謂之紫褶。其衣身領袖袂。請依今制。又案。令文。武弁。金飾。平巾幘。簪導。紫褶。白袴。玉梁珠。寶鈿帶。鞞。騎馬服之。金飾。卽金附蟬也。詳此。卽是二品三品所配弁之制也。附蟬之數。蓋一品九蟬。二品八蟬。三品七蟬。四品六蟬。五品五蟬。又令文。武弁。平巾幘。侍中、中書令、散騎常侍、加貂蟬。侍左者左珥。侍右者右珥。又開元雜禮。導駕官並朱衣冠。履依本品。此朱衣。今朝服也。然自一品至三品。並用四入之朱爲衣。乃叶上下之文。異絳繒之色。又令文。三品以上紫褶。五品以上緋褶。七品以上綠褶。九品以上碧褶。並白大口袴。起梁帶。烏皮鞞。竊詳。籠冠。平巾幘。與武弁大冠。其名雖殊。本是一物。製同而飾別。蓋以官品爲差。其幘亦戴在籠冠下。今請造袴褶如令文之制。其起梁帶形製。檢尋未獲。望以革帶代之。詔可。是歲。造成導駕官袴褶而未用。至乾德六年郊祀。始服焉。而冠未造。乃取朝服中進賢冠大帶。襪履參用焉。

太常因革禮卷二十六

總例二十六

輿服六

羣臣之制下

禮閣新編建隆四年九月宰相范質言三公祭服舊皆畫升龍請令禮官檢詳案三禮三公毳冕無龍章上公袞冕二品鷩冕又周禮言上公冕九旒以五采繩貫五珠旒長九寸每寸以珠玉瑱其衣玄色五章山龍華蟲火宗彝畫于衣其裳朱色四章藻粉米黼黻繡于裳又案令文旒並貫青色珠青纁其珠及充纁今請依令文服色之制詔從之遂改製焉又令博士檢緋紫襦襜制度案開元禮武士陪位大仗加膺蛇襦襜如袖無身以覆其膊音各蓋腋從肩領覆臂膊共一尺二寸又案釋名玉篇相傳云其一當胛其一當背謂之襦襜今詳襦襜之制其領連所覆膊膊其一當左膊其一當右膊故謂之起膊今請兼存兩說擇而用之是歲造襦襜遂用當胛當背之制禮閣新編乾德四年八月十四日禮院準敕修製朝服祭服者一朝服準令文白紗中單上有皐標領襖凡襖皆隨標色爲飾襖下緣也中單皆有襖舊只用白素小綾今宜依令文添皐標領襖準令文一品以下五品以上並有劍佩綬舊一品已下至三品並有劍佩綬四品已下悉無宜依令文添四品五品劍佩綬一祭服準令文白紗中單上有青標領舊是素小綾宜令並用青領襖